

✓ 33
811
326

强乃静齋

國

學

叢

編

第八期
寶盍署



國學萃編代派處

上海 神州日報館
南洋官書局

湖北 漢陽上鍋廠
廣裕和治坊

吉林 民政司警政
科錢質臣君

南京 坊口大街億太和布莊
虹橋甘溪沈公館

安徽 西門同康錢
莊孫次青君

蕪湖 大馬路松筠閣
礮窩街同泰莊

嘉興 東門南堰中市吳
大成號吳澄甫君

山東 濟南鐵路
分局余君

日本 大清公使館葉金毅君
中央大學堂曹民甫君

九江 官銀潯號
胡繼山君

鎮江 太保巷裕興號一魚巷文
成堂 榨油公司王君

吳城 吳城鎮商務分
會潘棟卿君

安慶 榮升街張剛勇
公祠張伯英君

清江 警察三區
秦渭雲君

四川 成都府安定書
局胡石生君

河南省城雙龍巷劉劍侯君
懷慶府採辦圖書局

香港 實報館潘
蘭史君

南昌 普智派
報處

蘇州 觀前九華堂 閻門
綠蔭堂 義源齋

廣東 華甯里總彙書畫處
濠畔街大清分銀行秦君

漢口 廣智
書局

揚州 文富堂惜餘春
仙女廟田家古玩店

天津 府署東梁
子亭君

北京 琉璃廠各南紙店 商
務印書館 有正書局

第八期

國學萃編

蘇寶盃署



晨	番	宣
風	島	統
閣	沈	元
刊	氏	季

捐助社費 芳名

以收到先後為次凡允助而未交款者概不送刊

歸化城圖書局捐洋十元

舒子寬先生捐洋十元

劉荅生先生捐洋十元

江湘嵐先生捐洋十元

特別加課題

李小峰給諫解組歸田有都門留別七律二章昨接六噫先

生來函囑將原唱刊出廣求海內大吟壇賜和卷交本社吳君夢蘭代

收限四月二十前截卷原唱附後 諸君和作不必拘體韻也

李小峯給諫留別原唱

憶從釋褐帝鄉居十六年華逝水如捧日心懸常戀 闕回天力薄尙陳

書斯文不墜民方覺枉道難甘志豈疏一奏未工名墮落好花茵溷任風

嘯



一官得失等鴻毛太息臺班視掾曹齧豆何容鳴仗馬浮槎且去釣滄鰲
 孤臣魂夢縈香草舊學商量秘善刀歸志未忘天下事中央莫忘大權操
 濯足萬里流圖再徵詩廣告 此為廻瀾閣主胡蘊山同社所加課曾刊入
 著渚吟社題目之後頃接蘊山兄函據云此課未得吾社中同人題詠殊
 未滿意大約 諸君以課卷郵寄費事遂爾擱章今再以此題徵詩如承
 惠賜佳章請交至本社沈太侔代收限四月二十前截卷贈彩格外從豐
 卷用白紙 諸君查第二期萃編即知此圖中風景矣 沈太侔代啓
 訪求宋元人詩文詞集啓 海內藏家如有孤本宋元人詩文詞集願割愛
 者請即 函知本社沈太侔君果係罕見本決不吝值也詞集必須汲古
 閣六十家及近人四印齋所未刊者始足寶貴詩集亦須元詩選所未收
 者文集則不拘也又如賴古堂所刻尺牘新編及藏弄集本社亦願收
 買此兩種為周亮工所刻本社已有結鄰集亟欲覓此兩種為之重刻也

樸學齋文鈔卷三

番禺沈宗畸太侔輯錄

馮夢華中丞歸里贈言

陳澹然

天地之機滯於一皆有至變者動乎其間惟至人之心豁物我治是非迺可
 更萬劫而不變水激而突火爆而流至變也而常乃寓焉得至人者談笑以
 決其常則變者怡然化矣嗟乎是豈博博一先生之說者為哉中國閉關數
 千年用專制雄天下其勢固至常也庚子之亂以攘外之故敗壞極於全局
 大臣毅然更始慨然驅一國之才陶之他族返則奇寵而異敬之不三年而
 排革之風震於全國大者矐殊族逞戈矛小則飛彈結纓以快其意大臣憤
 誅滅不效則思尊經術重詞章以靖之至丁未而皖禍益裂徐錫麟者浙人
 也年少東涉歸納貲以道員蒞皖皖帥恩公震其才舉巡警學校屬焉恩公
 無殊慝至皖尤尊禮江夏張次珊給諫能容伉直為羣帥所稀錫麟既得志
 獨結其黨凡二人謀殺之曰帥死我即帥也謀未定夏五月校生方舉畢業

儀則大喜媚帥請蒞焉詰旦帥則盛軍衛擁百官以入坐定其黨舉槍彈擊之不中錫麟狙擊中之乃呼校生曰革黨傷撫帥吾與若保軍械所衛之則相率奔街衢閉所門不出皖中大亂新軍將則呼東城外徵兵入西行驅械所至日中外寂然當是時帥既還軍府不能言次珊乃以帥命示校生無恐馳令箭壁城門先是錫麟封密函三十納諸懷至是則令校生擲城下招外兵不得入布政使金壇馮公見帥傷則大戚飛電江鄂帥促兵輪保皖久之令諸將攻所門校生入所三十人莫能戰錫麟踰垣伏隣宅乃縛而鞠之則抗愾大言曰帥固遇我厚然吾殺滿人乃公理非私也馮公大怒剖其心祭皖帥誅二黨釋校生以歸兵輪至而皖已大定 天子嘉之拜皖帥於是

一國中地震 朝廷特罷三品以下引見儀 詔士民上書祛滿漢陳憲法拜鄂帥南皮張公爲首相入樞府鎮之諸名帥則閉戟門謝諸客獨馮公脩然皖上日厲農桑索民隱搜古籍拔賢才効橫吏以是召嫉逾年而公以去

嗟乎古安有一族而成大國者故聖人之法斷仁暴而一廓其私列強之始小國寡民故爲種族之說內激其民以伺殊邦外驅異族以相屠殺然後乘間擊戮以殖其私此固外爭之奇術也而吾國之變乃獨自內爭始往者新舊相攻已成攘外攘外不效拒滿因之痛乎一人之私天下之私所由起也今羣虎耽耽瞻烏誰屋大臣乃且恣睢橫決絕清議快恩仇以縱其私漢族之爭又將作矣哀哉吾民奈何生波蘭高麗之域哉吾嘗痛天下大亂不始於小人而始於君子其事至變而其理實乃至常小人之亂刀鋸足以遏之獨至君子則刀鋸既窮且以激小人而禍乃中於天下惟區區文字差足懾其私以絕其流特非抱先覺之姿絕寵榮忘得喪不足以語此耳公之布政也吾行過皖上公大喜堅挽之卒乃畏讒謗以去然吾獨慮內外之爭將不知所稅駕也則本孟子去齊之意謬著原人哲俠辨平國議諸篇而思以化之明年而皖上禍作不尊不信自古然矣公博通中外撰述滿家一旦敝屣

節旄翩然江表短章草履徜徉金焦北固之間呼噏煙雲縱橫江海必將吐納百家折中萬國毅然成一家之說制萬世奇變於無窮澹不敏猶將奉几杖以敏之

袁瞿園主政東遊吟稿序

同光來朝廷懲海疆之變特命大臣使異國辟僚佐以從定制三年輒更代歸則考其紀述爲殿最凡以求政俗別人才法至善也久之良者則命僚佐錄西報而已乃署其名甚且購諸人以爲己業歸輒號於譯署曰吾著作也其精者乃并此忘焉而騰蹕益速於是遣使四十年而庚子禍作兩宮西入關大臣顧而歎曰使臣寡不足激殊邦聞奧也則命諸行省簡士之少者游學焉而東隣至邇也則赴者滋益多東人大喜張羣校以延攬之其法或半歲或三數年而畢業無煩記述也彼則授文書以呈學部焉精者購文書以返諸老大驚曰此外洋畢業人才也自此而漢文乃棄物已光緒三十一

年秋特罷向所稱舉人進士翰林者挹彼而寵之用則月非數百千金不至也授之官內則舍丞參卿貳外則舍監督統制不屑也其尤者則雖歲納萬金不復事一事則其名益重其才益奇蓋自黃帝來中國人才之盛莫盛於此時寵遇過使臣遠矣而革命流血之黨乃由是而起諸老則喟然太息曰此固未精中學也乃反而求之科舉士焉方科舉之未罷也最後則以楷書論策取舉人進士翰林矣取則闢進士館於京師羅東西政法言文之良者以教之三年而業畢曰此學於中國而未經異國也二十三年夏則發國帑以送之東國又懼其未盡也復簡時文詩賦翰林之老者倡之定制則數月而返命之曰若歸呈紀述若使臣狀吾將殿最之若譯署焉及歸諸老大喜賓禮而超擢之然其寵遇則固視外洋畢業爲稍殺矣何也曰此舊學而後乃新者也然獨幸翰林尤老者接踵樞府間翰林之氣一振其年少業維新者乃復奔走闕下蓋至是而新舊之爭融於一治千古調燮之功莫大乎此

矣彼得威廉之爲君畀司馬伊藤之爲相其強國也詎不以此哉吾同年友太湖袁君固畢業進士館而游歷東瀛者也夏出而冬返吾方客京師急叩之曰子老學四十年其必有紀述以懾學部大人者乎吾且爲子賀君曰未也吾詭而怪之則出東游詩屬以序予訝而觀之則蹶然笑曰子之拙乃且逾我乎吾研索中外政學三十年著書逾二百卷考其年中國談新學者未能或之先也獨念科舉時未暇楷法也新學之作則又衰落不克入新校通外言以此坐廢十五年不敢入京國久之困益甚顧念人心者政法之母也而哲學實樞筭之理無中外無俟通外言而始決也乃發憤著爲原人以折萬國之衷焉自忖半生著述惟此寥寥者雖孟子不吾易也迨滿漢訂而外爭且棘又懼吾國之續朝鮮也復假憲法以辨之謬自託於新學之林也及憲詔行則狂喜挾其書奔走數千里入國門而上書之詔復作台諫諸君子敦迫而獻之 天子焉當是時南皮張相國方入樞庭私喜王公大人可以

行吾說矣乃久之而竟寂然嗟乎吾既不克舉進士入翰林又不克通外言涉異國其因而自沮宜也君既成進士又入進士館涉異國以歸使爲紀述獻諸朝庶幾 天子動容大臣握手斯亦山野故人之光寵矣今舉國皆等而子乃鼓瑟其不爲昌黎怪詭者幾何哉君曰嘻子求經世數十年奈何茫然世故若此耶今之紀述則固嚮者使臣之術也予聞之愕然君曰子固不知今世有所謂運動之學哉精於此則徒手京師而卿相至矣尙安所事紀述者爲哉夫紀述而必自勞勞而必求政學此天下之至愚也今中外晏然大臣方偃仰雍容嘯歌自得子獨不見宰相日勞勞焉用詩歌射覆以相娛樂者乎蓋天下政學未有至精於此者吾子窮愁著書而獨昧乎此顧安得當世大人之一盼哉某之處京華久已既無運動之術以投當時其出也又以貧故不獲購羣賢纂東册而尸其名曷若放浪天倪縱橫異域睨睨長嘯於寥天絕島之爲快哉且烏知宰相大臣歡嬉觴詠者不將驚吾異國之詞

而詫為奇士也烏能效吾子窮老盡氣頽然作無疾之呻吟哉嬉子休矣余聞之嗒然自喪者累日間而覆其詩則凡鄰國風教之得失政法之良楛往往自見於筆墨蹊徑之外而悲歌俯仰之際且將勵國恥激人心而莫知所窮蓋其悲隱之深固有不忍託紀述以求達官貴人之表異者乃作而歎曰嗟乎君殆主文諷諫者流耶乃相與痛飲而罷客聞之笑曰兩君之言則固異時儒林貨殖合傳之奇質也乃次其語以冠簡端光緒三十四年夏六月序於陸軍部編譯局

效學樓述文序

歷城 張英麟 振清

嘗觀古昔文章之美以淹博儲其體以明達致其用凡夫經傳雅言列朝典志外而當代制作人物官曲之蹟內而至於身心性命之微苟為口耳可得講肄者皆道之所賅文章之所畢脩也 國朝三百年間問學之業極盛古文家言桐城一支號為義理考據辭章兼而有之主是說者非徒高自期許

鍊菴駢體文選卷二

番禺沈宗瀚太侔輯錄

送向仲瑣之大冶序

程士經

予年十四從官武昌殺青嚮晨飛白書夕嘯侶既闌心靈涸如丁酉家君實主譯學君業俄文予肄英語盍簪旬髯歡若平生接席而談對雷而食禰衡小友張鑑忘年結契青霞希蹤前軌僕燈暖四壁書詒五車門承淵源學罕淬礪獨於詩歌操觚靡間得句自烹輒形寤寐零愁積恨時來填胸喑喑之語呱呱之號固未數為外人道也然單唱易斷不若衆才之遄飛隻聲近寂不若羣籟之次發自與君識黠聞頓明篝燈暈帷商摧待旦春樹千里鵑魂訴紅星月一叢花氣浮白敲碁則落葉答響灑酒則池魚仰沫泊乎夕陽墮衣涼風出樹撰杖攬轡興言出遊登黃鵠之磯眺卻月之城過中旂之臺弔正平之墓仰視銀漢則神飛重霄俯瞰長江則魂墮滄森天地鬱其情感山川挹其古歡慨往哲之溟濛痛人世之殄沲駒隙易逝馬走斯惡君則以上

舍之翹雋纂揚雲之方言津寄既闕馨逸踰扇而金以口鑠蘭當門鋤西謝
峽靈南賡楚屈爰去大冶適當梅炎離筵旣張羈羽斯翕魯酒無消愁之用
吳歛實盪魄之唱霄壤荆棘幾爲跼步之場江廟桃花大有銷魂之色子方
錄別余亦言歸言笑晏晏齋居繫繫爲歡幾何頓成睽阻嗟乎年光鼎鼎寢
就荒忽彼蒼憐憫不可起問束皙之陔華待補茂先之勵志無輟去程霜露
冀保嬋媛鮑照行路豈惟來日之難杜甫論文應墜屋梁之夢爰系以詩曰
去者此日逝者此波子行則單我勞如何送子江潭執手嗚咽江濤齧舟不
能爲別恒星仰矚狂飆湍旋斷魂隨楫悲吟接天長蛟窺人妖鳥咒客鳥則
有巢蛟則有穴矧當羈絏能勿轉側巾卷悵惆球櫛陸沈歌以諗子兮子知
我心

贈趙桐軒序

六合 朱實發 飯石

今夫蛟龍伏於水而象罔能求石簣阻於山而夏王必採情動於所鍾物聚

於所好有固然矣然孺悲無介遂拒孔門楊意不逢誰知馬氏此古人所以
有獨立之憂動借才之歎也若僕於桐軒不然矣憶前以賓興之典萃於省
門維時王家虎豹謝氏芝蘭宋玉大言張辣小學李杜之光芒燕許之手筆
天士地士之離奇仙才鬼才之放誕靡不負馬骨千金望龍門三級譬之東
海張羅萬鱗潑刺鄧林選木羣樹槎枒僕與桐軒皆屛屛其間兩葉萍輕卅
年面隔牛馬無風相思少路猥欲通靈犀於一點證舊石於三生執暗鏡以
招西子渡弱水而會仙人只恐槐花風亂徒切予懷明月影低未知誰是彼
美人兮呼之不出矣而乃張華之劍波浪能通伯牙之琴山水易合八月初
吉遇於號舍時也暑短過隙風冷入檐天祇綫長室如斗大桐軒乃走相問
訊雅與周旋聞語言而悅王戎見名姓而知張廌論文章之工拙換稿相看
分飲食之有無推盤以進三條燭盡大呼渴睡之人一硯水乾互訂推敲之
字逮武庫旣收文壇已下猶復餘情眷戀別意牽連向新豐而問馬周如真

長之詣元度遂乃東方借乘南浦留人沾荀令之衣香陪謝公之屐齒每憶
新亭雨冷舊內烟消燕子泥肥瓢兒菜瘦一角之空城透迤幾聲之玉笛淒
涼相與感慨河山躊躇金粉醉杏花之村酒泛桃葉之烟波登幕府而覓基
枰到治城而開劍匣吹噓陵火來照寶衣搜剔宮苔去尋辱井問烏衣之子
弟看夕陽曾照幾人訪青溪之小姑知秋水舊流此處有是哉斯游不負秋
光與爾同消客况此一時也何其樂耶今者前歡已墜舊夢將迷尋鴻迹則
尚印江干盼鴉影則已離樹杪未免綠楊怨晚明月愁孤人坐青山曲歌紅
豆矣嗟乎生也何涯別原最苦江雲江樹記古人弔夢之詞秋雨秋風值我
輩言愁之日看尋芳草不見王孫尚有梅花遠交驛使爰揮楮墨小寄萱蘇
所望一脈心情各圖後會百年事業交勵前修他日者霜鐘遞應古瑟偕調
同登郭隗之臺齊入崔鑣之室雖川岳參差隔舟車於兩地而雲龍上下共
風雨於一天是日君子之交不愧古人之贊足下多情勝我其亦聽余言而

有意也乎

王春谷江城送別圖序

庚申之春友人王子春谷將歸里就試予既以詩送之越日又以江城送別
圖索題離襟未判別緒方長予豈能已於言哉然蔗尾雖甘不宜再嚼楊枝
最苦何耐重彈用捐韻語另綴駢文蓋僕與春谷一居江左一住燕南寒沙
雁杳誰知天外有人春樹雲遮難向夢中覓路然春谷乃遠兜雙屨輕裹一
囊渡黃河之水疑從天上而來騎青牛之背直向關前而下春谷外舅司樵
棠城春谷前來
之維時僕也老屋埋頭枯燈照眼吟詩度日作冷淡之生涯以墨磨人飽寒
酸之滋味門外之蓬蒿欲滿山中之桂樹誰招前望古人後顧來者偏絃難
張孤鐘不應昌黎有言言之而聽者誰耶唱之而和者誰耶不其然乎而春
谷顧水淡其性竹虛乃心不敢橫翔夸北方學者竟勞左顧訪南郭先生遂
乃束脩以上負笈而來愛子敬青甕骨能耐冷學揚雄字心喜求奇記曾

孤月影低寒鴉聲亂雨漂麥去雪撲燈來然且一壁白面雙管欲飛手題黃
絹之碑眼認金針之綫而僕既得解人用誇健者非宰我難離喜顏回易鑄
從此有疑必析無奧不詮或座彈點瑟則弟子翛然或帳出馬歌則先生莞
爾收李謚青藍之色聽伯牙山水之音回首當年有如昨日今者布帆一挂
春水方波來留泥雪之痕去啖菘鱸之味雖江上浮萍難禁風吹不散而水
邊贈芍何堪人對將離所期翹足無停焯掌自厲簫聲已脆更激其風花氣
方薰再加之露他日龍門得浪鶯谷逢春始郭隗於燕臺坐相如於漢殿使
聆音識曲者知焦桐曾譜於蔡邕望氣干霄者知霜劍舊磨於雷煥是則相
思千里藉報故人而固僕之屐齒願折者也

奉使車臣汗記程詩後叙

龍陽 易順鼎 實甫

蒙古延鐵君學士以木天之清望為草地之壯游 帝簡榮膺皇華妙選光
緒戊申奉 命往車臣汗致奠典至鉅也含景蒼龍之珮天吳紫鳳之衣異

似今紫草花可染鬢以沐髮即黑葉青如藍而多華

隰有游龍

游龍一名馬蓼葉粗大而赤白色生水澤中高丈餘

食野之萃

萃葉青白色莖似箸而輕脆 臆詩鹿鳴疏爾雅 釋草疏引作肥 始生香可生食又可蒸食

于以采繁

繁皤蒿凡艾白色為皤蒿今白蒿春始生及秋香美可生食又可蒸食 今白蒿以下十七字詩緝引作春始生可嚮香美又可蒸及秋名曰蒿韻會引略同 一名游胡北海人謂之旁勃故大戴禮

夏小正傳云繁游胡游胡旁勃也

菁菁者莪

莪蒿也一名蘿蒿 詩菁莪疏引 生澤田漸洳之處葉似邪蒿而細科生三月
中莖可生食又可蒸食香美味頗似萋蒿

言刈其蕒

萋萋蒿也其葉似艾白色長數寸高丈餘好生水邊及澤中正月根芽生芻莖正白生食之香而脆美其葉又可蒸為茹

食野之蒿

蒿青蒿也香中炙啖荆豫之間汝南汝陰皆云葭也葭毛本作比誤

食野之芩

王本奪此條丁本列卷末茲依毛本列此

芩草莖如斂股葉如竹蔓生澤中下地鹹處為草真實牛馬皆喜食之鹿皆詩

疏引作亦

采采卷耳

卷耳一名冢耳一名胡泉趣菜各本無此四字據日本刻一名芩耳葉青白色似胡荽白華細莖蔓生可鬻為茹滑而少味四月中生子如婦人耳中瑤

今或謂之耳瑤草鄭康成謂是白胡荽幽州人呼爵耳呼爵耳詩卷耳疏釋文爾雅釋草疏引作

爵之謂之爵耳

贈之以芍藥

芍藥未審今何草五字詩濂洧疏引及各本均列非是也句下今改列此

藥草芍藥無香氣非是也司馬相如賦云芍藥之和揚雄賦云甘甜之和芍

藥之美七十食之之丁本作也毛本作之

采葍采菲

葍蔓菁詩谷風疏爾雅釋草疏及御覽引作蕪菁毛幽州人或謂之芥菲似

菘莖粗葉厚而長有毛三月中蒸饈為茹爾雅疏滑美可作羹滑各本作甘據詩疏

詩輯要術御覽引改幽州人謂之芴爾雅又謂之蕒菜今河內人謂之宿菜

言采其蕨

蕨山菜也初生似蒜莖紫黑色二月中高八九寸老有葉淪為茹滑美如葵

今隴西天水人及此時而乾收秋冬嘗之又云以進御三月中其端散為三

枝枝有數葉葉似菁蒿長粗堅長不可食周秦曰蕨齊魯曰鼈亦謂厥又澆

以上據齊民要術引各本作蕨鼈也山菜也周秦曰蕨齊魯曰鼈初生似蒜莖紫黑色可食如葵文未全

言采其薇

薇亦山菜也各本無亦字莖葉皆似小豆蔓生其味亦如小豆藿可作羹亦

可生食今官園種之以供宗廟祭祀

言采其菑

菑一名蒿河東關內謂之菑各本奪此句據齊民要術引補太河內謂之藜

丁本奪此句詩幽州人謂之燕蒿幽州人要術一名爵弁一名藿各本無上

引御覽其根正白可著熱灰中溫噉之可詩緝飢荒之歲可蒸以禦飢漢祭

甘泉或用之其華有兩種其華毛本作其草丁本作其一種莖葉細而香一

種莖亦有臭氣以上十四字各本及御覽引作葉細而花赤有臭氣也今據

一種葉大而花白復香

用後世殆莫從而求之將取次付之刊不拘體不分類不限時於以傳古人
之精神亦以寄吾之精神已爾不復執人人而強聒也歸熙甫曰士孰不有
所為若仰以追思千載之前而俯以望未來之後世是可慨也是亦可以知
吾佚叢之旨矣丁未夏四月南禊序

潘文恭評張亨甫詩 亨甫王郎曲

張亨甫先生際亮籍隸建甯與姚石甫魯通甫諸君交誼甚摯敦尚名節有
不淫不移不屈之概潘文恭評其稿云亨甫負經濟才磊落有奇氣讀其詩
如天馬行空瞬息千里又如神龍變化不可捉摸殆得力於李青蓮而激昂
慷慨可泣可歌忠孝之忱時流露於楮墨間則少陵之嗣響也反覆斯編曷
勝佩服文恭之傾倒可謂至矣然亨甫終負才不遇侘傺以卒魯通甫有挽
歌四律悲痛不忍竟讀通甫才學經濟亦為曾文正所激賞每至京應禮部
試文正輒屏騶從至淮安館訪之暢論天下事凡鹽法河防軍政以及剿捕

粵匪之方整頓吏治之策靡不指陳井井不啻量沙聚米通甫娓娓言之文正悉以小冊記之某科會試放榜日文正官禮部侍郎於寫榜前語主司云今科若得魯通甫乃 朝廷之福也其愛慕之殷期許之切若此然通甫亦竟不遇大臣注意人材而猶不能造命殊可歎也

亨甫春柳詩嗣響漁洋傳誦京師余已錄入詩史矣集中有王郎曲七古豪宕淋漓駕梅村而軼長慶蓋詩派實融冶李杜不僅追步香山也當脫稿時都下亦競相傳鈔王郎名長桂爲春臺部歌者藉此以留姓氏亦云幸矣詩云天下三分月二分在揚州一分乃在王郎之眉頭彎彎抱月含春愁春愁多種揚州土付與歌兒更倡女王郎生小住新城瓊華照影春無主瀟湘雲曉秋始波盈盈一帶如銀河雙眸剪水清怨多臨風不語天奈何偶然一笑天爲和紅潮上頰生微渦團圓寶鏡汝何物常照歡愁顏半酡我見王郎日王郎已二十婀娜身輕鎖子骨衣香曉著花露濕人言前時結束乍登場能

使坐者忽起成癡立哀絲豪竹歌臺清王郎按歌嬌娉婷裊如語燕將啼鶯高下不斷傳春情春情且如此春愁復餘幾十年奔走豪家子五侯七貴皆歡喜駟馬並頭油壁車門前日夜馳流水門中曲室交綺疏堂上七尺紅珊瑚後堂塵掩百琲珠妖姬美妾絕世無御史中丞老尙書手提紈扇爲汝娛不數吳桐仙誰言夏秋美往年王紫稼見汝恐不如使我慷慨萬感俱使我一歎三長吁君不見長安歌兒好顏色王郎一出誇傾國如何文彩風流映八荒飄零京洛無人惜鬱輪袍歌不得琴久碎器且滌但傳王粲賦登樓那比子雲官執戟龍虎風雲夢未醒話向王郎淚霑肌或言揚州兒不如揚州女吟詩作畫態楚楚千金宛轉通一語邇來鹽筴疲粉黛亦苦飢青樓畫閣蝴蝶飛杜秋紅淚盈羅衣乃知艷色同爲天下重貴賤苦樂猶有時王郎王郎汝當勸我一杯酒富貴回頭幾是非人生冉冉行易衰

張亨甫漳州至泉州歸道雜詩

張亨甫詩無體不工而於紀行五古尤長今錄漳州至泉州歸道雜詩六首以見一斑 我來夫何爲况此歲云暮朝發東郭門征夫熟前路巖巖萬松間却立屢仰顧亂石峭紛挐牆壁隱丹素不知何人居下見檣帆度海天自洪濤雲物正迴互潮頭接龍江月色明虎渡兵爭幾世年壁壘猶如故浩然愴民生太平汝幸遇 少爲同客吏已知崇儒臣蔡呂曷足道蘇相誠先民卓哉祠堂記至今煥城闐我昨一瞻拜迴眺滄海濱萬峯若龍蟠赴水舒其鱗落日照蜃氣樓閣皆金銀山川鬱佳哉偉人信有神不聞李壯烈百戰捐其身吾少慕英風况茲防患辰晚對不可歸 在武夷五曲文公精舍之前公所名也 誓將清夷塵 山平野多風寒日出亂石東南天不高蕩蕩蓋海碧空中若雲氣不辨濤頭白因悲此鄉人揚帆遠爲客斥鹵不足耕豈甘淪異域如何忍誅求轉謂富珠璧民困盜乃多劫掠安可責賢侯慕龔黃良吏有循績歲晏懷冰霜生計念田宅嗟哉情游子歸來毋作賊 浹旬往復還重此沙溪宿數家出

粉垣上蓋榕荔綠仲冬扇蚊雷始信炎方毒噬膚不成夢坐愁風撼屋瀛壖多驚鷗沙驅折林木團團萬烟舍貼地如俯伏天低在簷宇墮露乃滅燭咄哉乾坤樞到此一轉軸茲宵豈海嘯魚龍鬪平陸波濤勢滿空寒氣浩在目因思昨來時行侶去已速一瞬卽滄桑千緣愴幽獨 坡坵盡犖确鑿井謀深耕列石敵華表轉水如瀉瓶種瓜既茂實種菓復敷榮四時間采摘亦足養汝生何爲赴鋒刃冒死尋鬪爭或言此地氣毋乃非人情民惟直可用勇以敢乃成收此十萬衆足爲靖海兵我無司牧責刑罪知誰輕頗聞五百人當時殉田橫 鄉氏起事日所用兵皆沿海民也 重山何峨峨絕海何蒼蒼山風裂石大海水流天長浩然雄關勢信矣偏霸鄉偉人代相望道德垂文章自從 國初來乃以材武強一夫仗意氣諸將皆侯王桓桓五等封勳名照旂常遂使李蔡後淒涼晦前光我茲一倚劍東西望重洋巖城下落日旌旆紛悠揚下有樓櫓列上有烏鴉翔誰與慎節鉞毋使行路傷

顧石公經報恩寺詩鄭太夷作蓋山詩錄序 懷明 徵君贈棲霞寺僧哭友人 三詩

上元顧子朋廣文雲與鄭太夷最相契洽所著蓋山詩錄清遠間放條然塵埃之外太夷為作序以表之序中述兩人同居金陵時相去可五六里恒散步往來或間日一見必歡悅如久別者既而縱譚竭所聞見今昔錯出乃至道路傳說里人雜事風日之佳勝魚鳥動靜皆記憶之以為譚資及其造語又皆被以元理衷以名教務為深雋可喜之說暮鐘動罷去則必送余至石城門下其間語默吟嘯起坐行立無不可以入詩亦恒為詩以記之而反不能盡故余謂石公真詩人也廣文取易介於石公 余謂太夷此序亦復委曲肫摯如石公之為人凡友朋往來必如此方可謂脫略形迹能以真性情相見即不致力於詩而其交誼亦當於古人求之况交誼肫摯如此其詩亦未有不工者也余與同邑徐倚虹前輩兆璋相契二十年無論久別與常聚相見必大歡悅其縱譚今古旁若無人之概頗與太夷所言略似前輩詩學甚深

與安茂卿

叔貞稱足下之念我百倍骨肉淒然者久之李少卿降虜胡服辮髮袒且左矣霍子孟上官少卿且欲請之歸太史公廷諍其冤遭腐刑之辱而不悔誠諒其心彼固欲得當以報漢也即僕今日之事乃數之矣係臂守宮奚足問直謂其心可剖耳茂卿足下僕不良苦哉而足下毅然請為僕之史遷良苦茂卿矣荆卿劍術之疏拊膺自咎酒人勾踐將何以誨我乎

係臂 晉武帝以緋綵繫所選女子臂

守宮 蟲名即所謂守宮砂也

與胡原荆侍御

海天閣前別時公與僕皆醉瞢然若夢中念公言苦如藥灑然醒矣兼程趣歸兒子亡賴黃口孱稚而彊作古押衙敗乃公事甚帷而召合浦還者使前顏色黯淡不可復識服茅山道士藥後想當然耳僕擁之泣非烟非霧若見

李夫人帳中魂也嗟乎原荆足下當是時即使公昔日之繡斧在能不化爲繞指柔哉王生也者奈何欲俾腸爲土木乎春風銅雀僕將老矣諸公有鳴鼓相攻者僕請肉袒援桴而助之三搥令四座動容掩鼻而悲耳

古押衙 劉振女無雙許婚王仙客值亂沒入掖庭仙客尋見古押衙與以茅山道士藥一丸私傳無雙令食死父贖尸還仙客遂復活爲夫婦
答吳幼安

損芳訊之及不勝蓬然積病十旬猶未起竿牘報問一切罷絕以重嵇生之懶秋水時至將放舸入秦淮挾足下共過長干寺中索桑門伊蒲饌聽諸沙彌談小品不覺舌端生蓮花也乃聞足下復生女郎以爲不憚已不藉緹縈上書矣此紅顏小媛幸稍娛目前何不足君所乎一馬得失不能福禍塞翁而足下附麗其事比於合鏡還珠也者過矣過矣羣口紛紛類牛鳴介葛盧來朝尙不省王生耳中聽松風瀑布且無暇而暇及汝南兒月且哉以一身

爲萬物芻狗漆園生奈何不譏倒置之民乎大珠編的的走盤焉用鄙言魚之目而冠其首將毋損其夜光邪

桑門伊蒲 伊蒲塞僧名

緹縈 馮子意有罪當刑歎曰生子不生男緩急終無益少女緹縈上書願爲官奴以贖父刑漢文憐之除肉刑

牛鳴 介葛朝魯聞牛鳴曰是生三犧皆用之矣蓋識牛聲也

芻狗 天地不仁以萬物爲芻狗見老子

倒置 繕性篇云喪已於物失性於俗者謂之倒置之民

答永嘉王中丞

損書報問談雁蕩間媿媿雲氣滿函中矣丹砂之惠知公之欲勾漏我也問者積病十旬不善飯飯而不當廉將軍案頭遺糝醫師醉二豎甚亡當或者乃辟穀乎則豈非公之大造哉表叔李君狷士也少攻二南聲籍甚數上公

車皆報罷髮且短矣而淪於一尉雞肋之味幾何不忍舍去傷哉貧耳然政得永嘉則有公之二天庶幾可者恐其猶有蓬之心在乞公護視之月飽南溪之流一石使其肝腸滌清他無望於永嘉也

雁蕩 山名在樂清縣東奇秀甲天下

勾漏 邑名出丹砂葛洪嘗求爲其令以便脩煉

蓬心 蓬非直物言心被牽制如蓬之曲也見莊子

與顧鄧州

秋暑灼人勝於炮烙一雨飄飄涼颺襲衣袍而僕病者蘇矣秋草五色映日而綺丹者的的不減春華之萼病久亡賴頽櫛俱廢以左手牽轆轤右手抱飯甕汲鳴泉而灌之得附麗於園公仲子之流足自媮快里中兒見鮮車怒馬則門闕而驚其疇不挪揄蓬蒿仲蔚哉二三墨者差可語而魁公尤白足方建小阿蘭若短牆疏檻翠微之色如染僕捫蝨其中則忘牛羊下來也顧

其聚沙良苦視鉢中徒有一朵青蓮耳持僕疏而叩公公如不吝以黃金布地者當掃除落葉以紅氍毹覆之矣

蓬蒿 張仲蔚隱於扶風杜門不出蓬蒿滿宅

白足 釋曇如足白於面人稱白足和尚

氍毹 毛褥以爲席地者也又東坡詩披香殿上紅氍毹

與顧君錫

首夏致書不得報知足下之在邠上也音問缺然以至今日雲中雁嗷嗷矣僕積病半載幸不死與寒松並支離耳足下頃何似秋風秋月蕩舟黃浦之間採芙蓉滿把娟娟如美人紅妝則豈不念以一束寄王生乎魁上緇流之秀禪藻燁然僕方外椒蘭也建蓋頭數椽所費不過貴人一玳瑁筵乃其難若聚恒河之沙茫然無畔岸僕疏而扣之十方足下福田不可不一布其種椒蘭 猶云親友也

玳瑁筵 劉楨賦云布象牙之席重玳瑁之筵憑彤玉之几酌撩碧之樽
十方 釋氏謂一切法界為十方

謀野集刪卷一終

尸咎綠營亦坐偷因仍養兵費耗食同螟螣禍始唐藩鎮至今為贅疣

一丁歲益銀餉冊入兩國以爲懷二心欲弱滿洲也承嚙偷生視息豈有遠中見
城門有禁威各洪承時以爲懷二心欲弱滿洲也承嚙偷生視息豈有遠中見
及百年後乎此亦準綠營養兵之制耳自唐以前無額兵雖有府兵田特如
今駐防之制盡郡縣而置兵蓋始自宋宋因五代藩鎮養兵之習而不之察

慎刑重民命獄詞無一輸昨者戮元功不憶賞狄俘西曹爭產痕獄貨飽

姦胥 都統勝保以跋扈賜死讞其罪云不應取苗沛霖之妾也山西富民爭
產獄三反唯論廢婦有無生產痕彼整冤不得雪而千萬家貲俱盡矣

禮臣不議禮工作工侵牟憲臺許風聞近歲寒蟬啁左都論加賦反黜爲國

羞 同治十二年左都御史胡家玉論江西加漕江西撫
奏辯顯達 祖制反計告家玉抗糧降三級調用 如以人廢官七卿盡

悠悠六部都察院大理院爲九卿 諸寺愈冗散囊粟不充厨近者太常樂日

壇陳月幾乃用月壇樂以爲垂簾之祥 翰林學山淵不識古鮑昭

編檢不知所出 吾鄉有周昌徐銘通博人中豪 樹銘京中言翰林張也又有
詩者不自知其名周尤惡此言人因云周恐爲半人也余問李李笑云此必半
人所得其治十年試貢士刑賞忠厚之至余廣詢館人皆不知所出乃得
猶當有陸敷編修館中世族數潘祖翁蘇張洞李文翔寥寥謝藩許振不知

猶當有陸敷編修館中世族數潘祖翁蘇張洞李文翔寥寥謝藩許振不知

時願舖程朱糟 修文在此時余實愧英髦寄止靈臺下賃馬供芻麥昨者

盜窺鄰伏屋升若揉五城佐京尹步軍設游徼職分權力輕民稠生業凋標

劍劫司寇懷刀狙直廬咸豐十年盜劫尙書靈桂御史奏言大司寇少司寇

朝房有飛刀刺之者執訊言醉狂竟釋不問黃編修問其事於寶公云外人造言也吁嗟下翫法匪獨相攻鈔羣臣議

大昏崇儉數樓樓寶衣費鉅萬織造撥民租國用誠乏財財糜國未痛舍大

而撫小外裔內欺誣矧今增釐稅庫帑不供儲子口七百萬和戎利在予昔

貧今已富算利謀誠迂胡爲握大錢頒鈔供官精脂膏潤內務宦者相染濡

安子小黃門御前頗承趨初無城社託資緣畏鼠狐熱車游九門廠店椎珊

瑚愚儒好憂天安意侍帷幙御膳供粗糞微詞傾六耶外間傳安得海供膳

故對曰昨六耶言宮中求索多或云謬啜茗取箸疑亞夫又傳云恭王每

聖母不悅未幾恭王革去議政王蔡生好抵巇奏上生崎嶇危乎臣不密嫁禍翻怨倭編林

御杯故云失禮蔡生好抵巇奏上生崎嶇危乎臣不密嫁禍翻怨倭編林

蔡壽祺奏劾恭王王嘗言蔡不宜在翰林及奏上太后問王有人言女知

怨 古來功名難中山涕漣如何况奄豎寵殃淫厚其辜制嚴城門禁邀救觀

杭蘇龍旗炫鬪津密帖令要遮王林不自脫歐刀徒見汚鄉非失堂奧終亦

費驅除安子取中旨往蘇杭催辦織造恭王以如張彈文錫言淺意有餘方

矜面謝恩已恨瑤殿孤內務府堂郎文錫有殊寵賞賜二品頂帶其父總管

史恒持齋求免禍勢傾一時同治十一年御新政光日月補天德維媯小臣

頌堯舜抑絕懲諛阿散館試士第一人嚴辰有女李公進麥歧邊都相切瑳

直隸督李鴻章奏瑞慶主隆康高宣臣無靡傅番 水旱時丁甯六月寒侵

膚馬首余欲西恒衛水揚波愁漂總督印同治三年陝甘總督沈兆霖且逐

黃河槎揚帆渡張秋大野派通荷漕運始郡縣陶唐致淩羸自唐人誤讀禹

制不知封建之挽輸誰厲階三朝勤濬挑黃運建三督歲費巨萬饒庸人一

生事狂流日滔滔賈讓復妄言棄地廣河溝於今行上策青徐歲淪鋪昔建

疏決議余思借疏把自黃河改道山東直隸歲損民田不登者數千萬以什

一計之民失業數萬萬矣咸豐九年余代山東撫作奏

請澹決不果上今西人頗有機巧鑿古禹益垂共工實水家上匠作機器豈
 可因此治北方水利賢於造船礮
 為商貨輸左伯忠翬翬船政謬可嗟將令夏變夷好勇乘浮槎盡弄旋殺羿
 學巧焉得踰毛公熙稍錚錚策士詢河渠同治十年會試舉人策問章則通
 鐵路效梁請一車蓋孝王請一車之道自國通於長樂宮彼哉不知本非墨
 還非儒儒術迂已緇羣言消已蕪 宿遷覽荒城青宵鳴夜鴉旌節爛哀浦
 邂逅陪秋蒐十年余南還于王家營霜登項羽臺鼓吹響晴洲追惟共艱戾
 始復歡唱酬尊前承善謔竊願比好仇鎮道公宴優人說王小二余云此必
 中欲說此今始說耳王小二者被筭不開口曾昔與左書引此誓不振衣
 通問故余以此諷之且為左解會笑云彼臥元龍百尺樓豈能如君言振衣
 登北固還船入大孤南浦水猶碧華年鬢獨梳聞君渡五領歲暮吟歸與桂
 水望佳客省中攜少姝鄧時携妾客廣初辭校書職旋避參軍除鄧在長沙
 及客桂林 文用既云寡修塗亦已紆還歸忽不樂送郡多椰揄 長沙舊游
 地懷舊空踣踖矜夸冠蓋盛恐懼山川枯昔吾從先進儉嗇仍瞿瞿尚書著

釘履贊善囊朝珠

湖南士大夫鄉居自咸豐軍興乃有仕宦之習道光中有

袋盛賓筵設空俎春盤登四孟

一鄉禮大宴九大設嘉慶則雙之為十內皆有

數不復撤去會國莖嘗論之以為聖人之制也丁敘忠言嘉道間元且後鄉

人出賀歲望門入謁無間識不識輒款留設酒肉菜四盤而止數日無厭倦

始徧焉其後留客必九筮而往至二月周歷鄉黨忘貴賤士農安名疇君婚

族饒富少玉矜簪裾

鮭菜門停闌府州

唐嘗於正月七日設食有掩芽客訝其早曰吾僕嫗已數

收侯鯖始萬氏

萬貢珍為布政使頗留意肴饌其厨

耳之羊燈鄉人雖官一品還則提燈咸豐中黃冕授吉安知府見巡撫用羊

燈自後雖商賈亦以羊燈書官銜矣黃居於趙家坪同治初趙家坪之名籍

甚 悉悉向二紀里巷並囂譁學徒雜兵子卿相賣鹽茶

軍與通鹽票又設茶

充典商商士 陸納無酒脯謝客反林巢避喧兼避地俱言狎漁樵 嚴冬役

官民始雜矣

車息祀竈春養糕人夫忽塞門倒屣提巾構且傾饋歲酒徐話契關由披圖

感桃燕

感桃燕

余有桃花燕子圖壬子除夕所得明年陳友連句歡梅飴君懷悵忽忽

余情更條條 緬維朋交盛求友歌嚶喬往者日以新來者日以凋名姓漸

沈暗新舊多喪殂茲我若不述一墮如牛毛况逢親政初方略進宸霄西陲

亦已甯伊挈望旅葵甘肅內地底定軍出嘉陝桑旣成陰陝西布政使茶陵

民種桑蘭粟不流膏左督禁甘肅儻宏維新政豈但收桑榆昨聞罷園工十刻

跪青蒲林表箴富平魚服戒余且東朝抵冒絮武帳被珠襦十三年七月晦

明園跪對至十刻及至直房懽不能起明日太后御弘德殿責逐諸監懼非盛養意陞極不相踰所貴嚴四輔

宏網略不苛參泰非大德政舉在黎儀且如寇亂初貧弱信虛榜錢漕十無

一征繕衆愁騷司農但坐嘯客帥車佻佻籌餉名關戶都督撫不應付凡欽

沁主游擊者有足餉自餘取之各省十不得一曾文正每云吾飽諸泊乎聞

外尊胡文忠李鴻遂雄鷺唯聞軍中富未奪農耘秣川鹽滯淮綱吳楚請借銷

國疆信由人患貧枉曉曉祥公秉鈞軸所諫何杪漂即今西域賈互市非侵

鈔制之一魁吏遠貢可坐招矜張海防禁破決成癰瘤愚儒與國議誤誤還

相樛秦衰始法密周末患文稠晚尋道家旨烹魚試漑鍋三獻幸未別袞裳

尋薜蘿 君家隔邵陵近歲長松柯令弟懶不仕翎枝拂青荷時開冬醪飲

醉惜年蹉跎默數二紀來憂樂互舛差邦君訪南漪南漪余與二鄧晚步之

張憲和知武岡與余昔夢已蘊蘊且宜醉公子余假居常氏莊常豫為鄧同

夷門也還歸報臨淄琴酒可延年道德可應時三人必有師所見盡著龜余

歌勸君飲陶然入無涯 君飲醉不謬余歌醒獨宜近追何曾唱咸豐八年

夕詩首句倡云後有千秋遠續壬子詞鏡明雪壓屋酒煖春生卮蜜橘那可

自此開會文正極賞之致往為消寒會供南豐蜜橘一斗為余夜江梅相對垂鄧弟招余至武岡書

綠相間余未能往及歸庭梅亦花矣昔與李樂平論古今梅詩李云江邊一樹垂垂發此句第一偏茲豈無感彈之智者悲

側聞離騷義尙恨莫我知余風肆且碩為君貽世規

亂踰三月乘輿西出外臣曾無釋位之義憂心靡投曾夏兩編修僻在桂淪

銜命奔問過衡相見感而有贈因五驛示重伯庚子閏月

皇綱偶失統夷盜戲交兵輔相固不臧方鎮謬連衡坐井而觀天智小惡遂成誰無父母憂憤起兩儒生精衛赴東海萬里各孤征天顏在咫尺所貴達我誠三仁昔計利董生用機枰求得有何怨長風送秋行君子勉于役慰爾飢渴情

圓明園詞 并序

圓明園在京城西出平則門三十里暢春園北里許 世宗皇帝藩邸賜園也 聖祖常游豫西郊次於丹棧泔泔蓋片字加水或不流也樂其川原因明武清侯李偉清華園舊址築暢春園藩邸賜園故在其傍雍正三年乃大宮殿朝署之規以避暑聽政前臨西山環以西湖湖水發原玉泉山曰鑾山度宮牆東流入清河水經注所謂蒟縣西湖綠水澄澹燕之舊池者也東流為洗馬溝東南合高粱之水故魚稻饒衍陂泉交綺 高宗皇帝嗣位海宇殷闡八方無事每歲締構專飾園居大駕南巡流覽湖山風景

之勝圖書以歸若海甯安瀾園江甯瞻園錢唐小有天園吳縣師子林皆仿其制增置園中列景四十以四字題扁者為一勝區一區之內齋館無數復東拓長春西闢清漪離宮別館月榭風亭屬之西山所費不計億萬園地多明權璫別業或傳崇禎末諸奄皆以珍寶窟宅於茲乾隆間浴池發金銀數百萬時國運方興地不愛寶 上心悅豫殫精構造曲盡游觀之妙元明以來未之聞也每歲夏幸園中冬初還宮內廷大臣賜第相望文武侍從並直園林入直奏對昕夕往來絡繹道路歷雍乾嘉道百餘年於茲矣 文宗初粵寇踞金陵盜賊蠱起 上初即位求直言得勝保曾國藩袁甲三三臣既以塞程徐陸先朝重望相繼傾覆始擢用前言事者各界重任三臣支柱賊不犯畿然迭勝迭敗東南數省蹂躪無完土 上閱蒼生之顛沛慨左右之無人九年冬郊宿於齋宮夜分痛哭侍臣悽惻大考翰詹以宣室前席發題憂心焦息傷於禍亂然後稍自抑解寄於文

酒以宮中行止有節尤喜園居冬至入宮初正卽出時園中傳有四春之寵皆漢女分居亭館所謂杏花春武陵春牡丹春海棠春者也然上明於料兵委權閩外超次用人海內稱哲而部院諸臣無所磨厲頗襲舊敝晚得肅順敢言自任故委以謀議先是道光二十年英吉黎夷船至廣東香港求通商不得又以燒煙起釁執政議和予海關稅銀千八百萬英夷請立約廣督耆英與期十年屆期而徐廣縉督兩廣夷使至廣州拒不許入以受封爵夷酋恨焉志入廣州咸豐元年英吉黎佛郎西米利堅各國乘粵寇鴟張中國多故復以輪舶直入大沽台王僧格林沁託團練之名焚其二船盡擊走之夷人知大皇帝無意於戰特臣民之私憤乃潛至海岸買馬數千募羣盜爲軍半年而成再犯天津稱西洋馬隊聞者恐栗夷馬步登岸我未陳而敵騎長驅矣十年六月十六日上方園居聞夷騎至通州倉卒率后嬪幸熱河道路初無供帳途出密雲御食豆乳麥粥

而已十七日英夷帥叩東便門或有閉城者聞轍而開王公請和和議將定十九日夷人至圓明園宮門管園大臣文豐當門說止之夷兵已去文都統知奸民當起環問守衛禁兵一無在者索馬還內投福海死奸人乘時縱火入宮劫掠夷人從之各園皆火發三晝夜不熄非獨我無官守詰問夷帥亦不能知也初英夷使臣巴夏里已拘刑部和議成以禮釋囚於是巴夏里與夷帥各陳兵仗至禮部訂約五十七條予以海關稅銀三千六百萬而夷人抵償圓明園銀二十萬王公奏言未敢斥夷文豐與主事惠豐同死於園不稱殉節但言遭兵燹而已十一年七月文宗晏駕熱河今上卽位奉兩宮皇太后還京垂簾十載巨寇削平而夷人通商江海往來貿易設通商王大臣以接夷使然常言某省士民燬天主教堂某省不行其教某省民教構釁日以難我應之不暇蓋岌岌乎華夷雜處又忽忽十有一年園居荒虛鞠爲茂草西山大寺夷婦深居予旅京師惻

然不敢過也同治十年春同年壬壬父重至輦下追話舊游張子雨珊亦以計偕來約訪故宮因駐守參將廖承恩許爲道主四月十日命僕馬同過繡漪橋尋清漪園遺跡頽垣斷瓦零亂榛蕪宮樹蒼蒼水鳴嗚咽由輦路登廓如亭南望萬壽山但見牧童樵子往來林莽間暮從昆明湖歸橋上銅犀臥荆棘中犀背御銘朗然可誦明日訪守園者得董監自言年七十餘自道光初入侍園中今秩五品居福園門旁導予等從瓦礫中循出入賢良門而北指勤政光明壽山太和四殿遺址至前湖圓明寢殿五楹後爲奉三無私殿九州清晏殿各七楹壞壁猶立拾級可尋董監言東爲天地一家春后居也西爲樂安和諸妃嬪貴人居也洞天深處皇子居也清輝殿爲 文宗重建與五福堂鏤月開雲臺朗吟閣皆不可復識鏤月開雲者卽所謂牡丹春也 世宗爲皇子當花時迎 聖祖至賜園而高宗年十二以皇孫召侍左右 三天子福壽冠前古集於一堂 高宗

後製詩常誇樂之經其廢基裴回怒焉東渡湖爲蘇隄長春仙館藻園又北爲月地雲居舍衛城日天琳宇水木明瑟瀝溪樂處僅約畧指視所在東北至香雪廊階前葦荻蕭蕭廢池可辨有老監奉茶自池畔出訝客所從來頗似桃源人逢漁郎也渡橋循福海西行爲平湖秋月水光溶溶一瀉千頃望蓬島瑤臺島上殿宇猶存數楹惜無方舟不達其下流水潺湲激石成響董監示予此管園大臣文公死所也西北至雙鶴齋又西過規月橋登綺吟堂經采芝徑折而東仍出雙鶴齋園中殘燬幾遍獨存此爲劫灰之餘亂草侵階窗櫺宛在尤動人禾黍悲爾雙鶴齋西爲溪月松風翠柏蒼藤沿流覆道斜日在林有老宮人驅羊豕下來東過碧桐書院地跨池東爲金鰲西爲玉螭坊楔猶存又東去皆敗壞難尋遂不復往莫色沈沈棲鳥亂飛揖董監出福園門還於廖宅廖澧州人字楓亭少從塞尙阿僧格林沁軍亦能言行間事感予來游頗盡賓主之歡既夕言歸則禮

部放榜日也兩珊既落第南去余與壬父每相過從念言園游輒惘惘不自得壬父又曰園之盛時 純皇勅記必殷殷踵事之戒然 仁宗始罷南幸 宣宗尤憂國貧秋獮之禮輟而不舉惟夫張弛之道宜及嘉道時補 純皇倦勤之功而內外大臣惟務慎節監司寬厚牧今昏庸諱盜容奸以爲安靜八卦妖徒連兵十載無生天主教目滋繇由游民輕法刑廢不用故也江淮行宮既皆斥賣國之所患豈在乏財又曰燕地經安史戎馬之迹爰及遼金近沙漠之風矣明太宗以燕王舊居不務改宅仍而至今地利竭矣又園居單外非所以駐萬乘廢而不居蓋亦時宜余曰然前年御史德泰請按戶畝鱗次捐輸復修園宮大臣以侈端將啓請旨切責謫戍未行恣悔自死自此莫敢言園居者而比年備辦大婚費已千萬結彩宮門至十餘萬公奏朝廷動用錢糧婚以成禮豈在華飾若前明戶部司官得以諫爭予且建言矣又余聞 慈安太后在 文宗時有脫簪之

諫關雎車轄之賢中興之由也又園宮未焚前一歲妖言傳 上坐寢殿見白須老翁自稱園神請辭而去 上夢中加神二品階明日至祠諭祠之未一稔而園毀豈前定歟子能詩者達於政事曷以風人之意備繇霜雲漢之采於是壬父爲圓明園詞一篇而周學士潘侍郎見之並歎其傷心感人筆墨通於情性余以此詩可傳後來盧夫代遠年逝傳聞失實詞中所述罔有徵者乃爲文以序之同治十年立秋日長沙徐樹鈞撰

宜春苑中螢火飛建章長樂榴十圍離宮從來奉游豫皇居那復在郊圻舊池澄綠流燕薊洗馬高梁游牧地北藩本鎮故元都西山自擁輿王氣九衢塵起暗連天辰極星移北斗邊溝洫填淤成斥鹵宮廷暎帶颯泉原渟泓稍見丹棧泝陂陀先起暢春園暢春風光秀南苑蜺旌鳳蓋長游宴地靈不惜鑿山湖天題更創圓明殿圓明始賜在潛龍因回邸第作郊宮十八籬門隨曲澗七楹正殿倚喬松軒堂四十皆依水山石參差盡亞風甘泉避暑因留

蹕長楊扈從且弢弓 純皇纘業當全盛江海無波待游幸行所留連賞四
園畫師寫放開雙境誰道江南風景佳移天縮地在君懷當時只擬成靈囿
小費何曾數露臺殷勤毋佚箴驕念豈意元皇失恭儉秋穰俄聞罷木蘭妖
氛暗已傳離坎吏治陵遲民困痛長鯨跋浪海波枯始驚計吏憂財賦欲賣
行宮助轉輸沈吟五十年前事厝火薪邊然已至揭竿敢欲犯阿房探丸早
見誅文吏此時 先帝見憂危詔選三臣出視師宣室無人侍前席郊壇有
恨哭遺黎年年輦路看春草處處傷心對花鳥玉女投壺強笑歌金杯擲酒
連昏曉四時景物愛郊居立冬入內望春初嫋嫋四春隨鳳輦沈沈五夜遞
銅魚內裝頗學崔家髻諷諫頻除姜后珥玉路旋悲車轂鳴金鑾莫問殘鐙
事鼎湖弓劍恨空還郊壘風煙一炬間玉泉悲咽昆明塞惟有銅犀守荆棘
青芝岫裏狐夜號繡漪橋下魚空泣何人老監福園門曾綴朝班奉至尊昔
日喧闐厭朝貴於今寂寞喜游人游人朝貴殊喧寂偶來無復金闈客賢良

門閉有殘甌光明殿燬尋頽壁 文宗新構清輝堂爲近前湖納曉光妖夢
林神辭二品佛城舍衛散諸方湖中蒲稗依依長階前蒿艾蕭蕭響枯樹重
抽盜作薪游鱗暫躍驚逢網別有開雲鏤月臺太平 三聖昔同來甯知亂
竹侵落出不見春花泣露開平湖西去軒亭在題壁銀鈎連到銜金梯步步
度蓮花綠窗處處留羸鱉當時倉卒動鈴駝守宮上直餘嬪娥蘆笳短吹隨
秋月豆粥長飢望熱河上東門開胡雛過正有王公班道左敵兵未蕪雍門
荻牧童已見驪山火應憐蓬島一孤臣欲持高絜比靈均丞相避兵生取節
徒人拒寇死當門卽今福海宛如海誰信神州尙有神百年成毀何忽促四
海荒殘如在目丹城紫禁猶可歸豈聞江燕巢林木廢宇傾基君好看艱危
始識中興難已懲御史言修復休道中官織錦紈綿紈枉竭江南賦鴛文龍
爪新還故總饒結彩大宮門何如舊日西湖路西湖地薄比郇瑕武清暫住
已傾家惟應魚稻資民利莫教鸚柳門宮花詞臣詎解論都賦挽輅難移幸

雜車相如徒有上林頌不遇良時空自嗟

甲午游仙五首

湘瑟秋清懶更彈只言騎虎勝驂鸞東華舊吏猶簪筆南嶽眞妃枉降壇
叔夜儻憑金換骨陳平何用玉爲冠淮王自許能驕貴卻被人呼作下官
只學吹簫便得仙蛻旌絳節領諸天定知吳質難成夢不與洪厓更拍肩
金闕未辭先受籙神山欲望恐無船晨雞夜半空回首驚怪人閒但早眠
新承鳳詔發金闈爭看河西墜馬郎幸不倚吳持玉斧可能窺宋出東牆
勞搓仙帶招燕使只借天錢辦聘裝曾受茅君兄弟訣休將十賚損華陽
鬱金堂內下重幃玉女無眠但掩扉塵暗素書長自讀月明烏鵲定何依
蛇珠未必能開霧鴛錦猶聞勸織機莫道素娥偏耐冷爲君寒透五銖衣
東皇眞誥有新封朶殿親題御墨濃眉嫵不描張敞筆額黃猶待景陽鐘
仙家往事如棋局夜宴來時帶酒容青鵲定知王母意幾從瑤島駕雙龍

永樂宮詞

聖語金銘戒燕私槌螺聲動曉光遲百年家法朝宣政不待花陰一叩時
武裝騎馬從宸游綴耳雙珠對鏡收針孔玉窠添粉捻被人看作富平侯
鳳衾新炷御香濃請枉應知敵體崇常在隔帷私向語至尊移枕待中宮
尹邢相見兩無猜和語天懷一笑開涼月照階清坐好綠牌頻奏玉妃來
花陰撲蝶奉宸懼錯向風前落御冠恐被昭陽嫌失禮不教宮監隔庭看
中宮升坐肅坤儀上直嬪妃跪玉墀御輦暗回仍轉步下階迎是霽威時
簫樓新引鳳雛聲傳報昭陽得帝甥宮女不知恩受重一時聞喜笑寒僧
良家四品選妃時注籍封紗暫出帷天語溫和褒識字六門姑姊誦彈詞
玉輦清游每夜來紅燈一簇上花臺離宮院院無門鑰不待君王手勅開
秀女新來見太妃明妝玉瑩六宮稀從來散位能嬌寵不祝君王賜寶衣

詩羣卷二畢

教坊歌舞古名曰伎日本尚存古意中國所謂歌伎容或有之舞則將失傳矣然所歌者亦時調耳高郵宣古愚人哲客大阪觀琉球女樂云一女彈琴素手音同聲宛轉六人歌郵亭自昔新詞進島國驚傳奉使過剗鞞登場遺俗在青衫忍淚老懷多東人拱手西人笑我獨無言奈汝何纏頭贈汝復誰憐與汝為隣異昔年愁對黎渦瓊島外舞來蜀妓魏宮前不隨辭廟降人去又入歌垣樂籍編聞道東京紅葉踊清秋猶待尚王筵感喟無端復能將異邦俗尚一一傳出洵為佳構又有署螭公者著江戶竹枝詞一卷將東京景物搜羅無遺紀其數百靖國神祠哭國殤銅仙兀兀立斜陽梅林殘雪花壇月賺得遊人盡斷腸泛泛中流趁暮潮海棠雙槳木蘭橈春風江戶村邊路楊柳依稀似六橋芝園花草恣流連閒向圓山瞰海埏何處雛娃年十五飄飄仙袂上秋千荷花花節勸提壺不忍池邊好畫圖却笑方塘無半畝被人強喚作西湖芙蓉丹頂久傳疑何用蓮華訪斷碑三尺秋墳名字在蕭蕭殘

柳弔梅兒綽約化枝倚錦屏黃河舊曲話旗亭尋常月落烏啼句譜入銀箏
最耐聽綠槐陰裏挂涼燈人在瓊樓第幾層小豆蜜柑隨意揀纖纖玉手爲
調冰均旖旎纏綿自饒風致未能備錄爲憾

同里黃半癡茂才第善畫工詩詞蒙于酒脫稿不自收拾且厭刪改謂作詩
如蟲吟鳥語應時則自然成聲已過卽成滯相不若不存稿本省後來一番
手口與造化相融于無跡不尤爲詩中之妙境乎記其曉發宜城云人語聒
唔上六街嚴城剛報啓門牌萬重積蠶鞭能破幾點疎星霧欲埋賣菜漸來
挑綠擔新泥微上踏青鞋長街短巷都穿能遙見江頭曉岫排抵家云記得
隆冬別故鄉霜飛縞素雪飛黃客中不識春風疾去後翻催化事忙名利自
憐蝸有國歸來已有燕升堂青青笑指庭前樹祗不多時盡解妝警句如雨
絲穿樹密雲縫露星稀怪石作人立懶雲先客眠搜春入畫帙倚醉作行書
自憐藏櫛刺無夢到侯門細雨牛毛斜織樹夕陽驢背穩馱人路于山氣朦

龐認愁與春潮浩蕩生白首歸來同奠酒青山寫遍不言錢論史要窮盤古
古放歌更比楚狂狂皆妙半癡長余十二歲余垂髫卽與訂交呼爲明月知
己曾鐫一小印爲明月知己四字分而藏之十五年前花晨月夕恒集于西
峰禪寺中聞詩角酒殆無虛日自余客京師半癡時遊皖鄂空山寂寞猿鶴
笑人矣近自里門寄余詩有云煮熟白雲千萬斛茅茨虛左待君歸蓋責以
及早還山同賦遂初之志也余前作藤化秋夢小劇所謂匡山大隱者卽半
癡別號其從弟魯鳧茂才甲森亦能詩落齒云補雖有術非親屬老倘生兒
定代興詞頗蘊藉年三十四以瘵亡今求遺稿不可復得矣

有人續絃以女家索值過豐未成半癡七夕贈詩云阻滯佳期又一年人間
河漢鵲難填算來有巧都無巧聘到天孫也要錢

于漢卿秉婦辭十首傳誦一時摘其極警敏者云三日羹湯姑不惡連宵機
杼婦難爲故夫山下言辭拙阿母堂前進退難未免有情完伐棗不能無過

失蒸梨對客頰羹邱嫂誤是誰擔糞小郎羞動心一事殊難直親解明瑞為定情花鈿粉盒齊拋却祇恨無方毀玉顏

性情詩能感人便佳毛詩雖有兄弟不如友生句為千古昆弟缺陷之極沉痛語唐人遙知兄弟登高處遍插茱萸少一人設想亦妙近讀趙嘏伯_巖哭弟云一檢遺篇一斷腸殘編牘稿滿奚囊荒餘筆硯縱橫擲束後詩書錯雜藏憐汝每偷聽講立慨余枉為嫁衣忙教人弟子疏吾弟亘古悠悠此恨長明白如話一字一淚哭從兄云重泉應瀝高曾淚一个偏傷伯仲行亦佳峻伯安徽合肥人

山陰何暢威_震詩才雋爽余在滬久聆其名以未見其詩為歎茲讀其歲暮云歲暮沉思天下事一生消得幾悲歡函胡閱世花千樣刻苦磨人墨半丸那肯心長隨髮短可堪夢窄較春寬繁霜未損江梅豔添得風懷別種寒夜坐云夜坐觀心妙自然拚將蕭散換狂禪遠因者意竟餘想愈夢經時似

小年筆響寥寥休雜奏琴聲曲曲祇遙傳分明天上人間感都在荒山亂雪前五言如才人窮有例名士冷于秋論世彈棋局甄能築室謀心疏難赴事力薄不支愁此意誰堪省膠膠亦漫求諸作皆俯仰身世不作憤激語自然穠麗又如商量舊學存千是料理名山值一狂繕性豈須通上理純情難免墮中乘誰有高風儕鹿豕微聞人類雜龍蛇文能造命言非妄氣不凌人度更冲非閱世有悟不能作此等凝馨語也

余昔客白門句云十載浪遊紅袖醉六朝蕭寺白雲多近讀休甯程甘園農部_雲句云八代古陵荒草沒六朝名寺夕陽多用意暗合甘園識余六載歌筵酒榭時相過從不知其能詩也戊申杪冬汪餘園前輩_述祖手甘園詩卷見示喜而盥誦之古作極有法則規仿太白近作饒有晚唐風味紀其雪際登紫雲巖云開門不見山天地一片雪寒色劃溪流幽壑積玉屑我踏冰上來石滑屐齒折巖溜瀉層陰此境自清潔煮雪煎松湫浣我肝腑熱暝景促

歸蹤惜與寒雲別秋山晚眺云古木一聲鴈但聞流水騰吟蟲催落葉鄰犬
吠孤僧詩思階前雨秋心夜半燈故人何處去翦燭幾時曾贈通州范中林
孝廉云當代陳蕃幕英雄惟使君孤琴自明月一榻空流雲痛飲花凝睇高
吟日漸曠廬山最高處重與讀奇文登晴川閣云城郭迴環枕碧洲晴川古
樹尙橫秋夕陽落水欲沉閣山色渡江飛上樓詞賦幾人追屈宋英雄無處
覓孫劉登臨遠攬蘄黃勝赤壁雄關扼上流津門旅感云錦陌銅駝淚已枯
薊門城郭莽平蕪三年水調桓伊笛四國兵交越絕書漫向金臺求馬骨誰
從滄海覓蠙珠文饒祠畔鷓鴣急寂寞黃公舊酒罇贈雲溪釣者云十載生
涯雲水中滿天煙雨一漁翁此心不在溪魚美祇愛山光入釣篷京都三藐
菴夜感云彰儀門外古僧寮蘆葦西風太寂寥記得夜涼天似水半鈎眉月
聽吹簫俱妙又摘警句云吟邊白浪連天涌醉裏青山一夜寒水下荆襄餘
戰氣江流漢沔總秋聲天風帽影黃花酒夜月簫聲白雪樓沙奔大野連城

而已古微詞品不可及人品尤不可及庚子夏秋之間黃巾黑山羣情洶洶
古微獨昌言其不可恃幾陷不測比年乞病却歸吳門與鄭叔問劉光珊輩
歲寒唱和有終焉之志 朝廷知其誓墓之詞甚苦亦不相強視近時三事
大夫之勇猛精進夜行不休者真可思量爛熟也已古微所刊有庚子秋詞
春蟄吟皆與幼遐諸人唱答之什其疆村詞三卷則近從吳中刻成見寄者
也還京樂云塞鴻近著意俄沙度月成秋響傍黃昏愁重旋攙鐵馬檐頭悲
哽澀淚花孤坐屏山背燭幢幢影倦睡減遙夜怨起羅衣新冷 聽壺蓮竟
夢滄波殘畫風鴉陣黑如塵垂翅未整江湖畫角聲聲暗驚回雨涼煙暝攪
愁腸是按笛人稀餐霞伴醒脈脈窺華髮清霜飛上明鏡花犯云影屏山燈
屑碎語春痕似依舊夜堂無酒憐燕綵誰簪蜜苴孤守睡輕厭數殘更漏欺
人年事驟曠淺鬢細梅三兩飄香黏半袖 簾櫳外邊峭寒多頭番問闌苑
東風醒否芳訊換還惆悵綴旂人瘦簫聲送背鄰笑語容易到林鴉驚散候

料鏡檻飛鸞塵澀新妝愁裏鬪宴清都云
餞臘蠻郵鼓聲聲急雁邊低和鳴
觴瓊簫市遠膏鑪焰薄好春何許橫谿
數萼嬌紅點綴入迎年秀語任向夕
雪意垂垂韓山冷落眉嫵 銀荷翠管
西船歌呼簾博渾忘鞦韆旅塗賤燥墨
沾杯淡酒自溫眠緒荒雞定憐沈夢是
一夜鄉心幾處喚緒風帆色新年春
程未誤訴衷情云鸞軒秋訊有無間
樺燭掩屏山琤然露井梧韻驚夢絳河
還 無別語擁眠鬢淚闌干蘭叢風起
未抵鍼樓羅薦新寒解連環云緒牽
愁結被蠻薰沁骨素天無極傍露井葉
葉疏桐信經過暮涼畫秋真色罷酒
闌干雁書斷浮雲東北望三山鑿翠尺
海漲塵有情難憶 登臨故懼盡擲
覩新霜鏡裏烏笑頭白待叩君密約鸞
釵怕著枕睡酣暗銷瑤碧夢入關榆
但流恨沈沈寒沙背西風怨蛩細語伴
人絮得聲聲慢云城痕煙結鏡曲香
銷巡闌遠避塵紅未近黃昏無人冷翠
濛濛西鄰舊家雙燕倚嬌暝新妒雕
窗尋勝處是檐虛岫納屨響廊空 誰
信傷春倦客費臨花驕馬愁對巫峯

多宴心情飄燈闌夜偏濃尊前幾人
闌淚背東風澆與珍叢酒醒未墮嬌雲
一片夢中秋霽云別枕潺潺障暗雨
簾衣暈冷燈色瘁葉涼喧晚蛩愁咽病
懷慣禁秋力倦吟暫息夢痕宛轉蕙絲
碧問故國誰睽夜闌孤坐瘴鄉客
驚臥歲晚亂落江蘼釣竿沈吟詩卷疏
寂背西風殘鷓苦說青銅欺鬢盛年
白歸事布帆從辦得怕酒醒後驚見畫
裏湖山采珠荒水擣塵新驛玲瓏四
犯云壓水夢寒濛花霜淺空陂鷗逝何
許數峰青弄影酒洗吳臺古何郎舊
情未賦又東風畫船煙浦淚粉春魂
輓塵游事吹老玉龍苦 行雲滿垂虹
路憶疏香步綺低髻迎戶往來羅袖盡
早蝶衝寒去清歌自在人間世送閒
客幽單春旅愁寄語無人問題裙舊侶
慶宮春云鳧玉封煙蟬梳拋黛鳳窠
旋旋黃昏流管梅芳綠屏蘭舊怨蟾不
照孤鬢絮絲亂又重疊清寒著人
宮衣添未催罷鸞賤銷瘦真真 相思
化作仙雲捐袂中洲心事虛陳傷別
啼妝端憂靈體蘅皋重夢無因墜懼尋
去鎖呵淚紅絲鏡塵迴衾燈暗還數

中宵鵲語殘春齊天樂云黃昏連樹拳鴉際江寒笛聲不起擁葉驚波呼風
斷角淒別歸鷺千里燈窗自倚漸冰折吳絲薄醪慵理尙有殘香夜深不煥
舊心字 荒雞空喚倦旅未應霜霰集誰整歸計箭水鯨聲櫺紗淡色落盡
涼蟾無寐西樓翠被怕一夕將愁玉瑤難寄曙蠟紅啼夢痕持淚洗惜紅衣
云倦侶哀時長愁送日坐支孱力病裏登臺霜林媚紅碧當脣注酒持一笑
剛腸從客喧寂涼兩雁聲識殊方棲息 明燈廣陌盈匊狂塵蒼波盪愁藉
湛盧迸淚去國海西北斷得故山歸思何地釣游尋歷酌晚英無語知是誰
家秋色

古微以壬寅秋晚奉 命督學粵東余與秦幼衡水部夏閏枝編脩集中聖
齋用夢窗韻賦霜葉飛詞錄別是日同游天甯寺歸翦燭至夜分始散古微
越日待舟唐沽寄和詞云亂雲愁緒孤帆外隨風飄著燕樹捲程先雁下滄
洲寒帶丁沾雨甚一雲颿輪過羽微塵驚見紅桑古怕更倚危樓海氣近黃

昏換盡酒邊情素 何況北極觚稜東門帳飲怨歌今夜難賦簡書猿鳥意
蒼茫空覓荒雞語夢不入葦絲半縷商量聽水聽風去剩恨笛飛聲罷寂寞
魚龍覩人眠處古微高臥東山幼衡閏枝各羈天末讀此殊有停雲之感
鐵嶺鄭叔問舍人文煒爲蘭坡中丞之子家世蘭錡累葉通顯叔問獨羈棲
吳下爲東諸侯賓客其神致清朗懷抱冲遠真衛洗馬一流人物所著瘦碧
冷紅諸詞規撫石帚卽製一題下一字亦不率意 本朝詞家雖多若能研
究音律深明管絃聲數之異同上以考古燕樂之譜者凌次仲外此爲僅見
絳都春云鵲魂一片怪小墅綠陰都被愁染鴻陣悄來淒緊西風黃昏院茜
裙殘縷吹香遠却醉入秋娘心眼夢回溝水紅情自老誤他題怨 還見披
煙浣露正燈暗絳屏和淚妝點霜信漫催吳錦飄零無人翦可憐生是江南
晚更解替幽花腸斷幾回立盡斜陽故山冷豔倦尋芳云小簾花瘦廢閣燈
昏孤詠何賴破碎壺天那管賦愁人在簾滴都無空綠瀉池流應有殘紅帶

到更闌怕南來好夢溼雲全礙 想幾處爭篷淒咽亂點西風飛上蛾黛便
 是秋聲一夜有情須買別淚銷沈鷗社酒浮根愁老鮭鄉菜悔前宵月明中
 負他芳靄惜紅衣云石髮吹涼林衣換雨滿懷冰玉秋色牆頭吳山翠如浴
 西樓舊夢還暗寫疏櫺橫幅愁逐江上暮鴻說南來淒獨 湖雲自綠吟斷
 蘋花年年鎮羈束文園未老醉耳勑絲竹可憶蜀波流錦解惜美人裳服待
 故裙書徧問訊草堂江籠虞美人云歌雲軟繡吳篷背暗浦明珠翠舊家池
 館久蒿萊說與鷗邊涼月帶愁回 長波西望垂虹路載雪吹簫處暗香不
 送倩魂歸可奈湖山無恙昔游非垂楊云霜魂似翦聽打窗敗葉亂愁紅染
 古屋清尊故人江上悲秋倦何堪來去秋相伴更殘夜與秋同餞問吳波流
 恨青溪比舊痕深淺 空有危炊一劍鎮消受冷官向誰肝膽素約沈沈蜀
 雲猶戀江南晚無多酒病因狂減怕勸老西風易散甚孤燈照入今宵和夢
 短壽樓春云看離江鷓鴣魂又零鈿翠繁倦笛黃昏誰念蘭芷捐佩鏡花空春

蔡寶善 字師愚浙江臨清縣人著有綠蕪秋雨詞

踏沙行

楊柳樓臺梨花院落春光蕩漾將愁作海棠依舊病懨懨一簾紅雨春陰薄
 心比桐枯身如蕙弱琴邊空負當時約燕翎慣繫斷腸牋惜花可奈東風
 惡

滿江紅

銀漢無聲悵咫尺廣寒宮闕薄寒峭闌干微倚素肌先怯塞雁歸遲空悵惘
 寒蛩啼冷猶嗚咽認朱簾一平抹小樓邊千重隔 香霧重雲鬢溼嬌欲語
 愁無力看玉繩低轉碧天無極似此心情原恹恹為誰風露中宵立更花陰
 深處月來遲西風急

金縷曲 春暮薄病感事懷人悵然有作

又送春歸去看連朝紅愁翠慘峭風零雨手把詩篇思往事悽斷文園情緒

尋舊夢荒唐無據不樂崔駟因底故倚東風悵惘和誰語腰瘦盡竟如許
行雲流水茫無主惹吾儕坐愁行悵鬢絲千縷我有長康癡絕病浪費清狂
舊句謾道是英雄兒女悟徹繁華多少事證禪心明鏡菩提樹一任爾戀泥
絮

露華 茉莉

冰姿皎潔看翠襯瓊芳素墜香雪嬈娜淡妝仙子初回瑤闕玉釵試看微簪
點染鬢雲幽絕撩人甚扶頭醉醒笑啟嬌靨 荒唐舊事誰說記碧玉芳魂
曾化冰縷滿院露華如水愁伴清月祇恐不賴新涼瘦損玉兒風骨秋夢冷
西風又吹玉屑

高陽臺 題峯雲岩傳奇

候館淒涼鉞櫳春影十年春恨如塵淺拍低吟含情爲弔湘君桃花人淚都
成血訴傷心一一銷魂情誰將絮果蘭因喚醒癡雲 獅江舊事空惆悵恨

接天烽火淒斷分鴛玉玦傷離匆匆檀板金尊飛仙已自歸環佩墜瓊枝月
冷燈昏剩而今法曲淒涼哀怨難論

齊天樂 寒柳

數重烟樹籠愁靄斜陽又添淒黯繫馬誰家成村幾處古渡寒鴉啼晚離情
未縮悵搖落江潭有人腸斷漢苑荒涼庾郎空自賦秋怨 青青攀折已盡
歎章臺往事腰瘦誰管翠縷飄蕭飛花糝碎怕問歸飛燕燕縑塵欲于句浣切
更把酒銷凝樓高望遠界破情絲落霞千萬點

醉太平

山程水程長亭短亭半江烟樹空明映離痕數星 香銷淚盈魚更雁更打
蓬寒雨聲聲正離人酒醒

高陽臺 春夜有寄

眉纈慵舒胸春易碾宵來淚滿羅襟禁病禁愁爲伊撩亂芳心纏綿莫解丁

香結轉柔腸寸寸難任細思量會少離多怨淺恩深
玲瓏紅豆憑誰寄負
春光如許一息千金路遠魂癡夢回翠帳沈沈檀奴已是腰肢減添憔悴何
况而今望歸來錦幔時開傳語青琴

菩薩蠻

嬌鶯絮絮留春住鷓鴣苦苦催春去去住總相思深情人不知
闌干遮夢
遠愁共春深淺微雨濕清烟香銷花可憐

前調

朝來淚洗臙脂面尊前不分猶相見無語理殘妝釵欹金鳳凰
新歌憐昔
昔好景空尋覓花外月如銀柳絲飛到門

菩薩蠻

戊戌秋季獨居寡歡檢讀化問集中溫韋諸作愛其詞旨悱惻
得騷辨遠意眷彼幽情感余身世嗟美人之遲暮悵寒窗兮誰
使觸緒紛來不能自己
因寄篇什以寫鬱伊

相思欲化文蕪草碧雲天際輕烟繞花落淚闌干殘紅不忍看
玉釵金鳳

墜明鏡妝重理心事鏡偏知朱顏非舊時

舊時清夢迷茫記風鬟霧鬢嬌無比袴褶繡鴛鴦泥人時世妝
近來風韻

減瘦比春前燕燕羽差遲碧桃開滿枝

玉樓天半簫聲歇珠簾羅幕重重隔含淚倚紅蕤夢回聞錦雞
天河星欲

曙又下廉纖雨紙恐養花難人歸春又殘

棠梨花謝鶯啼急新歡舊恨長相憶莫作等閒看憐伊將養難
別時空絮

絮密誓茫無據世世與生生知他能不能

金縷曲

與公璞談
近事感賦

相對茫無語正填胸百端交集萬般淒楚如此江山宜痛飲只我傷今弔古
歎冷眼幾人遲暮萬馬齊瘖天又醉更中原棋局翻新譜思往事淚如雨
雲昏日暗君知否莽茫茫十州三島是誰疆土天柱地維容易折缺陷媧皇
難補恐輕觸共工之怒便有六鰲扶宙合奈扶桑不繫金烏住又蹴起海中

霧

菩薩蠻

贈吳壘公及其姬人彭媽

春申江上花如錦尋春瞥見驚鴻影有美說彭媽比花應更妍
清游誰與共罷舞衫飛鳳何處最關情歌喉百轉鶯

延陵公子人中傑清才豔福能消得一笑便量珠蛾眉聘得無
渡頭雙打槳情共春波漲同證有情禪花開月正圓

三年塵海渾無定維摩天女原同命試問近何如熏香伴著書
人天雙美滿珍重如花眷鸞蝶證前盟雙飛過一生

南樓令

涼院碧雲天秋光絕可憐莽西風吹損池蓮寂寞梧桐疏雨過深院閉鎖秋
千舊事總淒然新愁特地牽悵南樓夜月空圓夢裏不知人事改情話處
尙纏綿

嫩寒初試鳳皇衫日日高樓望遠帆面積桃花研玉雪手抄貝葉貯金函皎
人泣淚緣何事脈望成仙自不凡小疊紅欄無寄處靜眠珍簟誦誦誦
西域曾聞樹曲躬卷施草不碍心紅傾來歡伯聽春雨語到冰人惱夏蟲我
見猶憐脂粉外人言可畏笑談中繡囊鏡聽餘佳讖五尺休尋照胆銅
薦蘿枝弱附喬松一見都由意外逢愁比并刀分淥水恨如磁石引針鋒淒
迷舊夢香台鳥榭觸前情晚寺鐘不意鬢絲禪榻畔依然相對兩吳儂
一抹銀蟾映綺牕心兵塵戰近全降鶯花莽莽春千里蕤蕤蕭蕭水一江或
可游仙師不二恐難奇法取無雙記曾暫臥殘英裏藍尾澆春倒玉缸
左家嬌女玉交枝好是思卿六六時袖裏金釵拋作卦盤中錦字織成詩依
稀似夢無人見彷彿聞香只自知憶捉迷藏樓一角曲闌干外柳絲絲
春深粧閣萬花園胡蝶成團宿不飛何處長陵尋好好今生奇想入非非莫
教子夜聞姑惡記得兒時怨姊歸好是腰支無一搦有人曾羨阿環肥

美人從古好樓居浩蕩狂香不似初爲點葩經刪鄭衛替箋爾雅注蟲魚度
詞都覺超凡品相對真宜讀道書莫唱折枝金縷曲少年消得幾躊躇
蟬鬢掃成拜紫姑桃窗雲楮碧紗幮思量海畔螺爲嬾容易山頭石望夫鏡
裏花顏長十八唇邊蘭氣淡芭蕉丁娘十索情何厚取次花叢悔濫竽
歌離弔夢怕重提豔曲猶聞唱大隄權味何嘗甜似蜜別筵難是醉如泥翠
翹金雀龜文枕畫屐紅樓雁齒梯屈指驚心凡幾度他時追憶定淒迷
明星三五酒如淮密約頻將雁使差此日看花憐我獨他年鬥草定誰偕未
妨謝女吟團扇生受飛卿賦錦鞵容易相逢容易別那知幃外是天涯
幃前一片夜明苔十叩銅扉九不開小憩可能通夢去今生不合帶愁來惟
憐學繡猶餘里何事環榴尙有臺解使圓趺新月樣唐宮畢竟留娘才
領上團花覆錦巾繡床餘暖在紅茵鶯花定署巡花使燕子居然入幕賓三
曲風流諸本事十重初利一情塵死火雙宿銀塘內信有人間妬嬾津

入月裙裾百和薰風流雲散舊知聞采聲久惡獅毛犬好色深慙豹脚龜靴
指書空呼負負竿頭進步歎云云摘花排個團圓話十里揚州月二分
萋萋芳草怨王孫細雨斜風畫掩門虔寫心經臨草聖聞拋眼淚慰花魂匡
牀妙可龍鬚席窮袴難侔犢鼻禪新序玉臺無限好牛毛麟角笑西昆
身如明月氣如蘭鏡破由來合最難知己因緣同絮果傷心滋味比梅丸下
韓雲髻新妨睡中酒緞腮却耐看駉馬垂楊離別處賦將春夢情珊鞍
送春風雨太珊珊芳草如愁未可刪湘筵翠調螺子黛越爐香熱鷓鴣斑熱
腸幹旋安於石冷語聰明妙若環却笑踏歌屏上女舞腰空自解弓彎
歷劫偏居離恨天惜春御史竟無權鬲花漏轉風中箭近水樓高月上弦僅
有青蓮歌當泣願無紫玉抱成烟蛾眉晚嫁尋常事教妾爲容自惘然
打鴨驚鴛木未料美人芳草漫魂銷有人繡閣知羅隱無已香奩續致堯經
月痕留衣上粉六時紅泛鏡中潮病容蕉萃心猶惜願作嬌鬢覆額貂

涼蟾花外露弓弰補過元稹善解嘲月地雲階知僥倖風鬟霧鬢太娥猶來
 因婢致遲離閣去比僧歸便打包教得小詞才上口篋牀連日悔輕拋
 琵琶休奏鬱輪袍悠謬何須記諾臬奮啖胡麻雲子飯新藏脂印桂紅膏仙
 桃好待千年熟城髻無如一尺高碧海青天回憶處銀河西瀉自滔滔
 憎煞香橙玉手搓迎風待月恐傳訛閒情此日非無賦相見天涯尚有坡寶
 帳春融憐異蛤寒宵更急怨靈龜累 濃笑書唐字未免尊前喚奈何
 神仙第一嬌凌華幅幅葦芽韻字紗風定間裁書帶草月明偷種米囊花屏
 間斜置烏皮几門外驕嘶白鼻驕搏土為人無賴甚蚩蚩千載笑皇媯
 玉淨花明百媚嬌纖桂偏稱大家妝繡經愛讀公羊傳築宅新圍牡蠣墻髮
 髻梳頭張住住風情絕世李當當垂楊跪地餘斜炷盡日低徊水際廊
 屏底初調鳳翼笙筵間親製龍裙羹摩訶池上方三月優鉢花梢欲二更未
 必才人皆不偶從來知己即傾城自家懊惱他人笑無用渾如折脚鐺

手按邏迤佐醞醞情場多是假惺惺被翻紅浪人初去酒泛黃華我獨醒一
 曲落梅才細篋雙鬢畫壁又旗亭關心舊夢難重記寫上紅羅數疊屏
 敲破情禪絕愛憎心期眉語太憑仍閨房以內張京兆書畫之中管道昇與
 燕爲仇春夢夢替花乞命日兢兢分明羣玉山頭見真個銷魂却未曾
 蕭瑟銀塘菡萏秋花光斜映合歡欄此中洗面餘惟淚無地埋憂爲是樓一
 笑大夫思射雉雙星織女憶牽牛神仙自是憐才者何況珠宮第一流
 舊游已過夢相尋荀令香爐覆繡衾一樣棲遲宜水乳千秋感慨在苔岑春
 風入幕應非昔夜雨飄燈直至今奢念貯嬌曾有屋等閒鄙煞等身金
 無端微笑與羞含扶病開幃盡日談私語鶯聲還噤噤旁人虎視却耽耽若
 非花月生何苦得侍妝臺死亦甘莫爲東坡圖笠屐張仙舊例本宜男
 養花天氣忽慳慳弓自非蛇足漫添研北香南相爾汝墻頭馬上互窺覘邀
 歡玉體偏微病倦繡金針却倒拈隱約一團花影在生憎不爲水精簾

重門深鎖鬲仙凡曾啖江瑤厭海蟻空仿手欣書白練怕成李益遇黃衫蓮
心著蜜無非苦水內拋鹽到底鹹飛燕裙邊頻下拜書生風骨自巖巖
韶華過眼怨忽忽采筆江郎賦枉工離恨天無權喜果同心人即可憐蟲聚
來頑鐵從頭錯網得明珠上手空情太纏綿緣太短五更殘夢落花中
此生心事惱吳儂弱水蓬萊隔萬重快我丹山棲采鳳怨他藥肆有飛龍花
經俗眼焉知好酒入愁腸別樣濃墮溷飄茵皆浩劫東風何事不相容
鑽日低徊韵字臆慵紅悶翠總難降多情不偶知無數賦命原奇轉怕雙暮
雨暗連神女廟落紅如怨孝娥江會心不遠傷心在日飯無何對玉缸
明知無益轉相思無力回天敢諱癡曾與臨池教畫蚓偶因匿笑拊凝脂已
醒胡蝶生前夢誰續春蠶死後絲留得銷魂仍不解龍鬚六尺沒人時
聲聲羯鼓使花飛堵角朱幡力甚微久識此中無許俊何從巷裏見崔徽春
當三月留難住絮出紅幃是亦非多謝桃源諸女伴送將娘去送郎歸

近作加減格傳誦者如田東方水部巴山隱詩品手把芙蓉盧紹棠駕部婁
室隱詩品著手成春此加字格也李小川侍御旨字隱唐詩一片花飛減却
春曩字隱詩品落日氣清此減字格也唐薇卿銓部婆婆隱字一皮字此而
拆而裏不拆者也韓蓀農學正秋字隱六才燭滅香銷此裏拆而面不拆者
也田東方俛字隱四子削何可得與韓子衡太史地楊隱古地名一京壁語
一土木換水池湯此裏面皆拆者也

茶有百損止能明目蒜有百益却能損目余素無目疾丙子春因時疫盛行
每飯必食蒜入夏忽患目疾兩月始愈因憶壁帖有眼科七十二症字樣可
以作謎裏遂思得柳條風疾四字扣之甚妙又漢清河王名蒜老謎有清河
王之子隱菜名蒜苗一條亦佳

老謎又有裴秀才遺摩詰書隱書經迪簡在王庭及字隱四子無人乎子思
之側二瞽談心隱四子予不得視猶子也寒食隱詩經會朝清明文猶質也

一節隱詩經與子成說皆極渾成

樊少容是惑也隱蒙經愛惡欲按古人嗜好不同文王嗜昌蒲武王嗜鮑魚齊桓公好服紫鄒君好長纓楚王好細腰齊宣王好食雞臠楚狂接輿好食橐盧木均分見於經史子集中

胡棣華有栩栩者蝴蝶也一條隱書經同人以周字莊字蒙字問俱不是有猜生則逸者揭蓋謝無逸有蝴蝶之號如鄭鷓鴣黎鷓鴣之類按典有兩人同而後世混而爲一者如袁安臥雪胡元安亦臥雪齊有蘇小小宋亦有蘇小小劉寬用蒲鞭十六國時有崔景真爲太守亦懸蒲鞭錢鏐射潮馬伏波亦射潮諸如此類不可枚舉

古無反切故訓釋者但曰讀如某字而已至魏孫炎始作反切其始出於西域梵學也厥後音韻之學日盛宋周顒始作四聲切韻行於時梁沈約又撰四聲譜繼是如四聲韻畧聲調譜之類紛然各自名家矣近謎家作謎亦有

用反切四聲者如莫更隱四子人名孟之反胡麥隱石頭記人名入畫古勞隱食物切糕覺字隱書經三江旣入皆此類

謎家於身體類皆用替代字如以官名二字作面仍隱官名一吏目因目神曰名故以名字扣目也他如以準扣鼻以邑扣耳齒爲骨餘髮爲血餘之類甚多然實皆有所本並非杜撰

謎有撮兩典爲一面者如何事扁舟嫁小姑隱百家姓句一奚范彭郎何扣奚字范蠡扁舟一事小姑嫁彭郎另一事飲馬投錢剛臥槽隱詩經仲山甫將之飲馬投錢項仲山事象棋臥槽另一事學稼不如重請業贈行無奈是陽關隱詩經折柳樊圃折柳一事樊圃另一事此二而一者也有拆一典作兩面者如同一盤游也而一隱詩經無已太康一隱四子說無所往而不爲愿同一我固疑是老奴也而一隱六才心坎上兒溫存一隱唐詩不待鏡臺前此一而二者也此皆三十年前舊作畧窗無事偶一憶及遂援筆錄之花

間集草端已詞云四月十七正是去年今日別君時韓孫農謎歸期約定九月九隱唐詩還來就菊花與章詞用意略同一溯前年之別一訂後日之歸皆一往情深矣

謎話卷一終



國學萃編價目表

零售每册	大洋二角	如付銅元照市計算
每月二册	大洋四角	同上
上半年十四册	大洋二元八角	預付上半年九折實收二元五角二分
下半年十二册	大洋二元四角	預付下半年九折實收二元一角六分
全年二十六册	大洋五元二角	預付全年八折實收四元一角六分

外埠每册加郵費二分如與敝處直接可免郵費先費後閱空函不答
 代派處提二成酬勞凡向代派處購閱者不得再有九折八折之扣仍須照
 章每册納郵費貳分此項郵費為開銷匯寄閱費之用郵費不得再提二成
 代派諸君有未將閱費寄繳者一律停寄仍須追繳所欠閱費

本社發行所在北京香爐營頭條胡同東首路北吳宅總經理吳夢蘭君